

Na osnovu Okvirnog sporazuma za "Rekonstrukcija regionalne ceste R445 Semizovac – Ilijaš – Visoko dionica: od mosta na rijeci Bosni u Malešićima do skretanja za Bioču u Starom Ilijašu sa odvodnjom oborinske i fekalne kanalizacije do recipijenta, dužine L=1300m", broj: 04-11-23356-OS/20 od dana 25.09.2020. godine i člana 32. Zakona o javnim nabavkama u BiH („Službeni glasnik BiH“, broj 39/14) zaključuje se

## UGOVOR II

za radove

**“Rekonstrukcija regionalne ceste R445 Semizovac – Ilijaš – Visoko dionica: od mosta na rijeci Bosni u Malešićima do skretanja za Bioču u Starom Ilijašu sa odvodnjom oborinske i fekalne kanalizacije do recipijenta, dužine L=1300m”**

Ugovorne strane:

**Direkcija za puteve Kantona Sarajevo**, ul. Hamida Dizdara broj 1, Sarajevo, koju zastupa direktor Selmir Kovač, dipl. ing. saob. (u daljem tekstu: **Naručilac**)

**Općina Ilijaš**, ul. 126 Ilijaške brigade broj 6, 71380 Ilijaš koju zastupa općinski načelnik Akif Fazlić, dipl. ecc. (u daljem tekstu: **Naručilac**)

**MGBH d.o.o. Sarajevo**, ul. Lužansko polje broj 7, 71210 Ilidža, ID: 4201764310004, koje zastupa direktorica Adisa Gačanović, dipl. ing. arh. (u daljem tekstu: **Izvođač radova**)

## PREDMET UGOVORA

### Član 1.

Predmet ugovora je rekonstrukcija regionalne ceste R445 Semizovac – Ilijaš – Visoko dionica: od mosta na rijeci Bosni u Malešićima do skretanja za Bioču u Starom Ilijašu sa odvodnjom oborinske i fekalne kanalizacije do recipijenta, dužine L=1300m, u svemu prema postupku javne nabavke broj: 04-11-23356/20, provedenog putem otvorenog postupka, uslova iz tenderske dokumentacije, dostavljene ponude Izvođača radova i Odluke o izboru najpovoljnijeg ponuđača, donesene u predmetnom postupku.

Predmet ugovora preciziran je prilogom ugovora (predmjer i predračun radova/specifikacija).

## CIJENA I NAČIN PLAĆANJA

### Član 2.

Ugovorne strane su saglasne da je ukupna cijena radova definisana prihvaćenom ponudom Izvođača radova i iznosi:

**1.279.508,33 KM** sa pdv-om  
(slovima jedanmiliondvijestotinesedamdesetdevethiljadapetstotinaosam i 33/100 KM)  
**1.093.596,86 KM** bez pdv-a

Ugovorne strane su saglasne da je utvrđena cijena za radove fiksna i nepromjenjiva.

Ugovorna cijena sadrži kompletne troškove koji su u vezi sa izvršenjem ugovornih obaveza iz ovog ugovora, uključujući sve neposredne i posredne troškove potrebne za izvršenje radova.

Cjenovnik radova utvrđuje se na osnovu jediničnih cijena, jedinici mjere za pojedine pozicije radova, iskazane u cjenovniku/ponudi Izvođača radova, po vrstama radova.

Prilog ovom ugovoru čini predmjer i predračun radova, sačinjen na osnovu predmjera i predračuna radova iz ponude Izvođača radova.

Općina Ilijaš finansira radove na izgradnji **fekalne kanalizacije**. Direkcija za puteve Kantona Sarajevo finansira **ostatak radova** po ovom ugovoru.

Kako predmet ovog ugovora nije izgradnja fekalne kanalizacije, to Direkcija za puteve Kantona Sarajevo vrši plaćanje po ovom ugovoru.

U slučaju da se prilikom realizacije ugovora pojavi potreba za nepredviđenim ili naknadnim radovima **ili bilo koje drugo povećanje osnovne ugovorene cijene**, Direkcija za puteve KS finansira radove **rekonstrukcije Regionalne ceste R 445 sa odvodnjom oborinskih voda do recipijenta**, a Općina Ilijaš radove na izgradnji **fekalne kanalizacije**.

Finansijska sredstva predviđena za realizaciju projekta doznačavaju se na račun izvođača radova na osnovu ispostavljenih situacija ovjerenih od strane nadzornog organa. Ispostavljaju se situacije, u skladu sa gore navedenim.

## **OBAVEZE IZVOĐAČA RADOVA**

### **Član 3.**

Izvođač radova se obavezuje:

- izvršiti sve ugovorene obaveze u potpunosti, kako je to predviđeno specifikacijom/predmjerom i ostalim priložima koji čine sastavni dio ovog ugovora,
- ugovorene radove obaviti u skladu sa važećim propisima i pravilima za tu vrstu radova, kao i zahtjevima Naručioca navedenim u predmjeru i predračunu radova/specifikaciji i tenderskoj dokumentaciji,
- garantovati kvalitetno izvršenje ugovorenih radova,
- održavati kontinuitet i dinamiku izvršenja svojih obaveza i u ugovorenom roku izvršiti radove iz predmeta ovog ugovora,

- osigurati i dostaviti Naručiocu garanciju za uredno izvršenje posla u visini od 10% od vrijednosti ugovora (bez PDV-a) u roku od deset dana od potpisivanja ugovora,
- u svemu postupati prema nalogima Naručioca, ujedno poštujući odredbe pozitivno-pravnih propisa i odredbe ovog ugovora.

Izvođač radova mora biti dostupan u svakom trenutku za slučaj hitne intervencije i hitne potrebe Naručioca te na poziv Naručioca hitno reagovati.

Izvođač je dužan radove izvoditi u skladu sa usvojenom tehničkom dokumentacijom, uzansama o građenju, pozitivnim zakonskim propisima, važećim tehničkim propisima, standardima i smjernicama te pravilima struke.

## **OBAVEZE NARUČIOCA**

### **Član 4.**

Naručilac se obavezuje:

- pravovremeno uputiti prigovore na eventualne propuste tokom obavljanja radova, u slučaju da radovi nisu u skladu sa ovim ugovorom i ponudom Izvođača radova,
- uredno izvršiti plaćanje ugovorenih radova, isplatiti naknade za izvršene i prihvaćene radove prema odredbama ovog ugovora,
- odrediti nadzor nad radovima i obavijestiti Izvođača radova o identitetu nadzornog organa,
- pravovremeno izvršavati svoje obaveze po ugovoru.

Naručilac ima pravo da vrši stručni nadzor nad radovima Izvođača radova i da na taj način kontroliše kvalitet radova.

## **ROK ZA IZVOĐENJE RADOVA**

### **Član 5.**

Izvođač se obavezuje da će radove koji su predmet ovog ugovora izvršiti u skladu sa ugovorenim obimom radova i utvrđenom dinamikom do **31.08.2021. godine**.

Izvođač ima pravo da zahtijeva produženje roka za izvođenje radova u slučajevima kada je to opravdano, odnosno u slučaju nastupanja izvanrednih okolnosti koje onemogućavaju izvršenje radova po predviđenoj dinamici.

Opravdanim razlozima za produženje roka za izvođenje radova smatraju slučajevi koji se ne mogu dovesti u vezu sa odgovornošću Izvođača radova i to viša sila (prirodne nepogode, poplave, zemljotresi, i sl.), geološki i/ili hidro-klimatski uslovi, mjere predviđene aktima nadležnih organa, nastanak uvjeta za izvođenje radova koji nisu predviđeni tehničkom dokumentacijom, i slično. U slučaju eventualnog nastanka osnova za podnošenje zahtjeva za produženje roka izvođenja radova, Izvođač radova je dužan zahtjev podnijeti prema Naručiocu po hitnom postupku u odnosu na momenat nastupanja nepredviđene okolnosti.

U slučaju prekida radova ili nastanka situacije ugrožavanja sigurnosti i prometa, Izvođač radova je dužan bez odlaganja preduzeti hitne mjere u cilju otklanjanja opasnosti i sprječavanja štete te o

svemu obavijestiti Naručioca. Navedeno se vrši na način da se osigura racionalno i efikasno obavljanje posla. U slučaju obustave radova, Izvođač radova je dužan preduzeti mjere u cilju očuvanja radova i rezultata rada te iste zaštititi od propadanja, sve prema pravilima struke.

Izvođač radova je, u svrhu osiguranja od nastanka opasnosti, dužan obezbijediti potrebnu propisnu signalizaciju.

Naručilac ima pravo da raskine ugovor ako Izvođač radova propusti da izvrši svoje obaveze u toj mjeri da je opravdano očekivati da neće izvršiti kvalitetno ugovorenu obavezu u roku koji bi za Naručioca bio prihvatljiv. U tom slučaju ugovorni organ neće platiti Izvođaču radova onaj dio radova koji je u nastavku rada nemoguće koristiti.

## **ROK PLAĆANJA**

### **Član 6.**

Ugovorne strane su saglasne da će se plaćanje po ovom ugovoru izvršiti u skladu sa odredbama tenderske dokumentacije i potpisanog ugovora, u roku od 60 dana od dana prijema računa i ovjere situacije od strane nadležnog nadzornog organa.

Plaćanje se vrši na račun Izvođača radova, koji je on u svojstvu ponuđača naveo u ponudi.

## **NAČIN OBRAČUNA, KREIRANJA, DOSTAVLJANJA SITUACIJA**

### **Član 7.**

Za izvedene radove Izvođač radova ispostavlja obračunske/privremene i okončane situacije po završetku radova.

Situacije se sastavljaju na osnovu stanja izvedenih radova krajem obračunskog perioda, a ispostavljaju se najkasnije 10 dana po isteku perioda za koji se vrši obračun izvedenih radova. Datum ispostavljanja situacija obavezno se upisuje na situaciji.

## **OVJERA SITUACIJA**

### **Član 8.**

Situacije se dostavljaju nadzornom organu, koji iste nakon ovjere prosljeđuje Naručiocu.

Ovjeru ispostavljenih situacija vrši nadzorni organ Naručioca.

Datum podnošenja na ovjeru situacije nadzornom organu upisuje se u građevinski dnevnik.

Nadzorni organ je dužan da u situaciju upiše datum ovjere.

Nakon što nadzorni organ ovjeri situaciju, Izvođač radova istu šalje Naručiocu.

Okončana situacija ispostavlja se nakon potpunog završetka radova.

Situacije se ispostavljaju na osnovu podataka iz građevinskog dnevnika i građevinske knjige.

## **OSIGURANJE STALNE PROHODNOSTI PUTEVA I SIGURNOSTI SAOBRAĆAJA**

### **Član 9.**

Izvođač radova je dužan radove izvršavati *prema dinamičkom planu i upustvima nadzornog organa.*

Izvođač je obavezan da ugovorene radove izvodi kvalitetno, u skladu sa *utvrđenom dinamikom*, na način da se osiguraju uvjeti za siguran saobraćaj.

Radove u skladu sa utvrđenim obavezama iz ovog ugovora, Izvođač radova izvodi uz upotrebu *odgovarajućih sredstava rada, materijala i opreme.*

Izvođač radova je dužan da u okviru radova prioritarno usmjerava sredstva na blagovremeno izvršenje radova kojima se osigurava stalna prohodnost puteva, odnosno nesmetan i siguran promet, a u skladu sa nadležnim propisom o osnovama sigurnosti saobraćaja na cestama.

Istovremeno sa završetkom radova, sa ceste se moraju *ukloniti ostaci materijala, sredstva rada kao i drugi predmeti i sredstva* korištena prilikom izvođenja radova.

### **Član 10.**

U skladu sa važećim zakonskim odredbama, Izvođač radova je dužan o svom trošku blagovremeno *preduzimati potrebne mjere sigurnosti i zaštite na radu.*

Mjere sigurnosti imaju za cilj:

- zaštitu života, zdravlja i tjelesnog integriteta lica koja izvršavaju radove ili prolaze gradilištem, odnosno stanuju u neposrednoj blizini gradilišta,
- osiguranje javnog prometa u toku izvođenja radova i u vrijeme prekida radova, odnosno do potpunog završetka radova,
- sprečavanje mogućih šteta učesnicima u saobraćaju i oštećenja ili uništenja izvedenih radova, trupa ceste, saobraćajne signalizacije i opreme ceste,
- sprečavanje oštećenja ili uništenja susjednih objekata, prometnica, instalacija, opreme, materijala i sredstava rada, poljoprivrednog zemljišta i nasada i sl.,
- urednu predaju gradilišta po završetku radova.

## **OTKLANJANJE NEPOSREDNE OPASNOSTI PO SIGURNOST SAOBRAĆAJA**

### **Član 11.**

Izvođač radova je dužan izvršiti radove koji nisu sadržani u predmjeru i predračunu radova, ukoliko se izvršenjem takvih radova otklanja neposredna opasnost po opću sigurnost i sigurnost saobraćaja.

Radovi koji neposredno utiču na sigurnost i prohodnost saobraćaja ne mogu se prekidati dok se u potpunosti ne ukloni opasnost i ne uspostavi sigurna prohodnost puta.

O navedenom je Izvođač radova obavezan hitno obavijestiti Naručioca i nadzorni organ.

## **DINAMIKA IZVOĐENJA RADOVA**

### **Član 12.**

Izvođač radova je dužan da nakon potpisivanja ovog ugovora, a prije uvođenja u posao, Naručiocu i nadzornom organu dostavi prijedlog dinamike izvođenja radova na saglasnost, a koja treba obezbjediti kontinuitet radova, na temelju preuzetih obaveza iz zaključenog ugovora.

Dinamika izvođenja radova treba biti usaglašena sa ugovorenim rokom, te se Izvođač radova obavezuje poštovati rokove iz dostavljene dinamike.

## **KAZNA ZA KRŠENJE ROKA IZVOĐENJA RADOVA**

### **Član 13.**

Izvođač se obavezuje da održava kontinuitet i dinamiku izvršenja svojih obaveza, kako bi se posao završio u roku određenim ovim ugovorom.

U slučaju zakašnjenja sa izvođenjem radova u normalnim uslovima, Naručilac će tolerisati Izvođaču radova prekoračenje roka od 2 (dva) dana od ugovorenog roka.

Za svaki dan zakašnjenja završetka radova preko 2 (dva) dana, Izvođač radova će platiti Naručiocu kaznu u iznosu 0,5% ugovorene vrijednosti za svaki naredni dan zakašnjenja. Maksimalna kazna za kašnjenje radova je 5% od ukupno ugovorene vrijednosti radova.

U slučaju kada Naručilac ocijeni opravdanim produženje roka za izvođenje predmetnih radova ili kada potreba produženja roka nastane bez krivice i odgovornosti Izvođača radova, pomenuta kazna se ne zaračunava.

## **PRAVA NARUČIOCA**

### **Član 14.**

Ukoliko Izvođač radova ne izvodi radove u skladu sa zahtijevanim kvalitetom, odnosno važećim tehničkim propisima, standardima, smjernicama i usvojenoj dokumentaciji, ili radove izvršava na način kojim se ugrožava sigurnost prometa, Naručilac ima pravo da obustavi daljnje izvođenje radova i da od Izvođača radova zahtijeva da u datom primjerenom roku, koji definiše Naručilac, otkloni nedostatke koji su doveli do obustave radova.

Ukoliko Izvođač radova ni u naknadno utvrđenom roku ne izvršava ugovorne obaveze, Naručilac može raskinuti ugovor i radove ustupiti drugom izvođaču.

Naručilac ima pravo da Izvođaču radova odbije dio od iznosa fakture za svaki dan nekvalitetno izvedenih radova te ukoliko je ugrađen nekvalitetan materijal koji ne zadovoljava standarde i radove koje bude radio nakon pismenog naloga nadzornog organa kojim se nalaže obustava radova.

Izvođaču radova se za radove na kojima su utvrđeni nedostaci neće priznati rad i trošak radne snage za te dane. Nekvalitet radova utvrđuje nadzorni organ na osnovu građevinskog dnevnika. Izvođač radova je odgovoran za sve posljedice koje mogu proizaći zbog nepridržavanja naloga o obustavi radova.

## **RAD BEZ NALOGA**

### **Član 15.**

Izvođaču radova se neće priznati niti platiti radovi koje bude obavljao bez naloga Naručioca, kao ni radovi koji nisu obuhvaćeni ugovorom, predmjerom ili projektom.

Izvođaču radova se neće platiti radovi koje bude izvodio nakon pismenog naloga Naručioca kojim se nalaže obustava radova i Izvođač radova je odgovoran za sve posljedice koje mogu proisteći iz osnova nepridržavanja obustave radova.

Izvođaču radova se neće platiti ni radovi koji nisu izvršeni prema nalogima, tehničkoj dokumentaciji, standardima, smjernicama i pravilima.

Naručilac ima pravo da Izvođaču radova odbije dio naknade od iznosa fakture za nekvalitetno i nepotpuno izvedene radove, nakon što iste utvrdi nadzorni organ.

## **ODGOVORNOST ZA NEISPUNJAVANJE UGOVORNIH OBAVEZA**

### **Član 16.**

Sve štete nastale uslijed neizvršenja posla, nekvalitetnog, neblagovremenog, neadekvatnog i nepotpunog izvođenja predmetnih radova, kao i štete prema Naručiocu i trećim licima, za koje je odgovoran Izvođač radova, nadoknadit će Izvođač radova.

Na osnovu pismenog izvještaja nadzornog organa o neizvršavanju ugovornih obaveza i nekvalitetnom izvođenju radova od strane Izvođača radova, Naručilac može raskinuti ovaj ugovor, poslove i zadatke dodijeliti drugom izvođaču, aktivirati garancije i tražiti naknadu prouzrokovane štete od Izvođača radova.

## **GRAĐEVINSKI DNEVNIK I KNJIGA**

### **Član 17.**

Izvršeni obim radova za radove utvrđuje se na osnovu građevinskog dnevnika, ovjerenog od strane nadzornog organa.

Građevinski dnevnik se koristi kao osnova za kontrolu radova na putu, za izradu građevinske knjige, odnosno obračuna izvršenih radova i za kontrolu rada Izvođača radova.

Građevinsku knjigu ovjerava nadzorni organ po izvršenju radova (privremene i okončane situacije).

Na kraju obračunskog razdoblja, građevinska knjiga i obračun radova dostavljaju se Naručiocu.

Izvođač radova dužan je da vodi građevinsku knjigu.

Građevinska knjiga se vodi u jednom primjerku.

Izvođač radova će voditi građevinski dnevnik u dva primjerka, od kojih jedan predaje Naručiocu, a drugi zadržava za sebe.

Poslije konačnog obračuna, Izvođač radova predaje Naručiocu građevinsku knjigu.

### **Član 18.**

Izvršeni radovi obračunavaju se i unose u građevinsku knjigu po završetku svake faze radova, a u slučaju kada radovi traju duže vrijeme, obračun stvarno izvedenih količina vrši se na kraju obračunskog perioda. Snimanje odnosno utvrđivanje podataka za građevinsku knjigu vrše zajednički predstavnik Izvođača radova i nadzorni organ.

Građevinsku knjigu ovjerava nadzorni organ po izvršenju radova. Svi radovi u knjizi trebaju da budu praćeni adekvatnim skicama kojima se dokazuju količine i lokacije izvršenih radova. U prilogu građevinske knjige treba da bude fotodokumentacija u digitalnoj formi, snimljena na CD ili DVD medij.

Pored ovako formiranog priloga građevinske knjige za određenu fazu radova, potrebno je i u sklopu listova građevinske knjige printati u koloru neke izvode iz fotodokumentacije sa praćim objašnjenjima i podacima, koji su neophodni za razumijevanje dokaznice i definisanja lokacije radova.

Na osnovu ovjerenih količina radova iz građevinske knjige vrši se ispostavljanje privremenih obračunskih situacija.

## **STRUČNO TEHNIČKI NADZOR, KVALITET I KONTROLA KVALITETE RADOVA I MATERIJALA**

### **Član 19.**

Troškove stručno-tehničkog nadzora snosi Naručilac.

Stručno-tehnički nadzor u izvođenju radova vrši Naručilac putem ovlaštenih nadzornih organa.

Nadzorni organ svojim potpisom ovjerava kvantitet i kvalitet izvršenih radova te podudarnost ugovorene količine i cijene rada sa izvedenim i obračunatim radovima.

Izvođač radova je dužan da radove izvršava u skladu sa važećim standardima, smjernicama i ugovorenim uvjetima.

Kvalitetu ugrađenih materijala Izvođač radova dužan je dokazati nadzornom organu atestom.

### **Član 20.**



Nadzorni organ je dužan da kontroliše da li se radovi izvode u skladu sa usvojenim dinamičkim planom, propisima, standardima i smjernicama, ugovorom, pozitivnim propisima i pravilima struke.

Nadzorni organ, putem upisa u građevinski dnevnik, daje Izvođaču radova potrebna tehnička uputstva i druge podatke (nacrte, detalje) potrebne za izvođenje radova.

Izvođač radova je dužan nadzornom organu omogućiti uvid u obim i kvalitet izvršenih radova te ga pozvati da putem građevinskog dnevnika izvrši prijem istih.

## **ISPITIVANJE MATERIJALA**

### **Član 21.**

Izvođač radova dužan je da prije izvođenja radova osigura i dostavi na uvid dokaze o prethodnim ispitivanjima materijala.

Prethodna ispitivanja kvalitete materijala i radova vrše institucije registrovane za ispitivanje građevinskih materijala i radova.

Troškove prethodnih ispitivanja snosi Izvođač radova.

Izvještaj i rezultati kontrolnih ispitivanja dostavljaju se uz privremene situacije.

Ukoliko Izvođač radova nije na vrijeme izvršio kontrolna ispitivanja i nije dostavio izvještaj i rezultate kontrolnih ispitivanja, Naručilac neće platiti izvedene radove.

Po dostavljanju izvještaja i rezultata ispitivanja izvedeni radovi će biti plaćeni.

Ugovorne strane su dužne da uredno vode i čuvaju dokumentaciju o prethodnim i kontrolnim ispitivanjima materijala i radova. Nalazi kontrole izvedenih radova upisuju se u građevinski dnevnik.

U slučaju osporavanja nalaza o postignutom kvalitetu izvršenih radova, mogu se sprovesti naknadna ispitivanja. Troškovi naknadnih ispitivanja padaju na teret strane čiji nalaz nije potvrđen.

## **PRIMOPREDAJA IZVRŠENIH RADOVA**

### **Član 22.**

Nakon izvršenja radova i poslova koji predstavljaju tehničku ili funkcionalnu cjelinu vrši se primopredaja radova po količini i kvalitetu što se utvrđuje na osnovu pregleda izvedenih radova i atesta o ispitivanju materijala i radova, obračunom u građevinskoj knjizi i konstatacijama u građevinskom dnevniku.

Primopredaja se vrši po količini, kvalitetu, a na osnovu operativno-tehničke dokumentacije o izvršenju radova (građevinski dnevnik, građevinska knjiga, dinamički plan) i pregleda stanja izvršenih radova na terenu.

O primopredaji radova sastavlja se zapisnik u koji se unose svi bitni podaci o izvršenju radova, a potpisuje ga nadzorni organ i ovlašteni predstavnik Izvođača radova. Ako se zapisnikom o primopredaji radova utvrde nedostaci u odnosu na ugovorene uvjete Izvođač radova je dužan otkloniti nedostatke u roku utvrđenom zapisnikom.

Sve promjene i odstupanja u odnosu na ugovoreni obim radova ili tehničku dokumentaciju prethodno odobrava Naručilac na pismeni zahtjev Izvođača radova, uz saglasnost Nadzornog organa. Za navedene radove za koje postoji zakonski osnov za zaključivanje novog ugovora, a ukaže se potreba za istim, sačinit će se poseban ugovor.

## **USTUPANJE RADOVA DRUGOM PRUŽAOCU**

### **Član 23.**

Izvođač radova nema pravo ustupiti ugovorene radove u cijelosti ili djelimično drugom pravnom licu.

## **GARANCIJA**

### **Član 24.**

Garantni rok se definiše u skladu sa pravilima struke i za izvedene radove iznosi **3 (tri) godine** računajući od dana okončanja svih radova.

Izvođač radova daje garanciju da su radovi iz predmeta ovog ugovora urađeni kvalitetno, u skladu sa važećim propisima, standardima, tehničkim normativima i pravilima struke i da odgovara za sve eventualne propuste nastale kao posljedica neadekvatnog izvršenja.

Neurednim ispunjenjem ugovornih obaveza smatraju se nedostaci u radovima koji su predmet ovog ugovora, ukoliko su otkriveni za vrijeme trajanja garantnog roka.

Izvođač radova je dužan obezbijediti безусловnu bankarsku garanciju za uredno izvršenje ugovora u visini od 10% od vrijednosti ugovora (bez PDV-a) te istu dostaviti Naručiocu najkasnije u roku od **10 (deset)** dana od potpisivanja ugovora.

Period trajanja garancije mora obuhvatati period od početka do okončanja svih radova po ugovoru, biti uvećan za **30 dana** u odnosu na period trajanja samog ugovora/perioda izvršenja radova, te obuhvatiti i garantni period (**3 godine**) za izvršene radove (koji se računa od dana okončanja svih radova).

## **VIŠA SILA**

### **Član 25.**

Ako slučaj više sile potpuno ili djelimično spriječi izvršenje obaveze po ovome ugovoru, ugovorna strana koja se poziva na slučaj više sile obavezna je da obavijesti drugu ugovornu stranu u roku od 3 (tri) dana od nastanka više sile.

## **KORIŠTENJE UGOVORNIH DOKUMENATA I INFORMACIJA - POSLOVNA TAJNA**

### **Član 26.**

Izvođaču radova nije dozvoljeno, bez izričitog pristanka Naručioca, objaviti ugovor u cijelosti ili dijelovima te objaviti informacije primljene od Naručioca. Navedeno se ne odnosi na informisanje ili pristup dokumentaciji vlastitog osoblja, ali sve samo u mjeri u kojoj je to potrebno za uredno izvršavanje ovog ugovora, te u drugim slučajevima propisanim pozitivnim zakonskim propisima.

Dokumente i podatke prema ovom ugovoru, Izvođač radova i osobe navedene u ovom članu trebaju čuvati kao poslovnu tajnu tokom izvršavanja ugovora i u daljnjem roku od dvije godine po izvršenju ugovornih obaveza te su odgovorni za povredu navedene obaveze.

## **RJEŠAVANJE SPOROVA I MJERODAVNO PRAVO**

### **Član 27.**

Ugovorne strane će nastojati svaki spor iz ovog ugovora ili u vezi s izvršenjem istog riješiti pregovorima i u duhu dobrih poslovnih odnosa.

Ako se pregovorima i u duhu dobrih poslovnih odnosa sporovi iz prethodnog stava ne mogu u razumnom roku riješiti, za sve sporove iz ovog ugovora i u vezi s njim, uključujući i sporove koji se odnose na pitanja njegovog valjanog nastanka, povrede ili prestanka, kao i pravne posljedice koje iz toga proističu, nadležan je sud u Sarajevu.

## **POSEBNE ODREDBE**

### **Član 28.**

Ovaj ugovor ostaje na snazi do potpunog izvršenja ugovorenih radova. Ugovorne strane mogu sporazumno otkazati ovaj ugovor i prije njegovog izvršenja ukoliko, neovisno od ugovorenih strana, nastupe okolnosti, koje bitno utiču na predmet izvršenja ugovora. U tom slučaju ugovor se raskida ili se prema potrebi zaključuje novi ugovor.

Ugovorne strane su saglasne da Izvođač radova neće zapošljavati fizičke i pravne osobe koje su sudjelovale u pripremi tenderske dokumentacije ili su bile član Komisije za javne nabavke Naručioca ili su u svojstvu stručnog lica bile angažovane od strane Komisije za javne nabavke, i to najmanje šest mjeseci po zaključenju ovog ugovora, odnosno početka realizacije ugovora.

Prava i obaveze ugovornih strana regulisana su pozitivnim zakonskim propisima Bosne i Hercegovine.

## **OSTALE ODREDBE**

### **Član 29.**

Sva korespondencija vezana za ovaj ugovor bit će u pisanoj formi. Pod korespondencijom se smatraju, odobrenja, dopuštenja, nalozi, upustva za rad, i slično, po ovom ugovoru.

Za dodatne radove koji se ne mogu izvršiti u okviru ugovorenog iznosa iz ovog ugovora, a ukoliko postoji opravdanost i zakonski osnov za to, ugovorne strane će zaključiti novi ugovor.

## ZAVRŠNE ODREDBE

### Član 30.

Ovaj ugovor stupa na snagu danom obostranog potpisivanja.

Sastavni dio ovog ugovora su njegovi prilozi, i to:

- Izvještaj sa e-aukcije
- Napomena o srazmjernom umanjenju cijene
- Prihvat ispravke računске greške
- Zahtjev za prihvat ispravke računске greške
- Predmjer i predračun radova

### Član 31.

Ovaj ugovor je sačinjen u 6 (šest) primjeraka, od kojih svaka od ugovornih strana zadržava po 2 (dva) primjerka.

**IZVOĐAČ RADOVA:**

Adisa Gačanović, dipl. ing. arh.  
Direktorica  
„MGBH” d.o.o. Sarajevo

Broj: 142/21.  
Datum: 07.06.2021.

**NARUČILAC:**

Selmir Kovač, dipl. ing. saob.  
Direktor

Direkcija za puteve Kantona Sarajevo

Broj: 04-11-23356-U2/20  
Datum: 02.06.2021. godine

**NARUČILAC:**

Akif Fazlić, dipl. ecc.  
Općinski načelnik

Općina Ilijaš

Broj: 031-19-1224/21  
Datum: 04.06.2021